


Kecemerlangan akademik atau vokasional mampu jana ekonomi



DEBAT MENGENAI ADITUKANG ATAU SISWAZAH UNIVERSITI: (Dari kiri) mantan ketua eksekutif Institut Pendidikan Teknikal (ITE), Profesor Law Song Seng; ketua program Pengajian Asia Selatan di Universiti Nasional Singapura (NUS), Profesor Vineeta Sinha; rektor kolej yang juga pengurus Pusat Undang-Undang Antarabangsa NUS dan juga moderator Forum Tembusu, Profesor Tommy Koh; serta Duta Besar Jerman ke Singapura, Dr Michael Witter, dalam Forum Tembusu di NUS, Isnin lalu. – Foto-foto TUKIMAN WARJI

► HASLEEN BACHIK
hasleen@sph.com.sg

MENJALIN hubungan rapat dengan majikan, dan bukan ijazah, yang sekadar dipandang masyarakat sekeliling, adalah kunci bagi mengetahui apakah keperluan mereka.

Demikian dinyatakan Duta Besar Jerman ke Singapura, Dr Michael Witter, dalam Forum Tembusu ke-13 di Kolej Tembusu Universiti Nasional Singapura (NUS) Isnin lalu.

Forum bertajuk *Apakah lebih baik menjadi Aditukang atau SiswaZah Universiti?* itu membincangkan kebaikan dan batasan pendidikan universiti berbanding kemahiran vokasional.

Dalam ceramahnya, Dr Witter, seorang daripada tiga penceramah di forum tersebut, berkata sistem persekolahan vokasional di Jerman yang berkait rapat dengan perniagaan dan industri mungkin boleh dipelajari Singapura.

“Peniaga atau majikan dalam industri tahu apa keperluan di tempat kerja demi memajukan ekonomi di samping memberi seseorang individu itu pendapatan baik hasil pekerjaannya,” ujar beliau di hadapan sekitar 220 mahasiswa NUS daripada pelbagai jurusan.

Dr Witter berkata setiap siswaZah mahukan pekerjaan setelah menggagam ijazah, namun adalah penting seseorang itu mendapat pekerjaan dalam bidang beliau ada komitmen dan kesungguhan untuk mencapai kecemerlangan, baik dalam jurusan akademik maupun vokasional, hingga menyumbang ke arah kemajuan negara.

Forum tersebut diadakan pada hari yang sama Perdana Menteri Lee Hsien Loong melawat ibu kota wilayah Saxony di Jerman, Dresden, yang dikenali dengan kekuatan institusi pendidikannya melahirkan pelajar yang mempunyai kemahiran demi memenuhi permintaan industri Jerman.

Semasa di sana, Encik Lee turut menyaksikan majlis memeterai perjanjian antara Universiti Teknologi Nanyang (NTU) dan Politeknik Nanyang (NYP) dengan institusi pendidikan Jerman bagi meningkatkan pertukaran pendidikan antara tiga pihak itu.

Menjawab soalan moderator forum, rektor kolej itu, Profesor Tommy Koh, yang juga pengurus Pusat Undang-Undang Antarabangsa NUS, apakah pendekatan laluan pendidikan di Jerman, Dr Witter berkata aditukang adalah satu konsep formal di negara itu.

Menurut beliau, laluan mencapai taraf aditukang di Jerman sama seperti perjalanan universiti. Ia melalih seseorang agar lebih cekap, dan ini termasuk menduduki peperiksaan bagi mengasah dan meningkatkan kemahiran sehingga akhirnya berjaya menjadi pakar.

Seorang lagi penceramah forum itu, mantan ketua eksekutif Institut Pendidikan Teknikal (ITE), Profesor Law Song Seng, berkata di Singapura, ITE telah banyak berubah daripada dipandang rendah hingga kini menjadi institusi global dengan ramai pengunjung dunia.

Namun, usaha mengubah cara pemikiran dan penerimaan masyarakat terhadap aditukang memakan masa, ujar beliau.



KONGSI PENGALAMAN PENDEKATAN VOKASIONAL DI JERMAN: Duta Besar Jerman ke Singapura, Dr Michael Witter, dalam Forum Tembusu ke-13 di Kolej Tembusu Universiti Nasional Singapura (NUS) Isnin lalu.

Ini kerana telah sekian lama Singapura sudah terbiasa dengan budaya yang menyenjunggi ahli akademik.

“Hakikatnya, kita tahu setiap seorang daripada kita mempunyai keistimewaan tersendiri. Kita ada kekuatan, minat, sikap dan kaedah pembelajaran berbeza. Ada cenderung dalam bidang akademik. Ada lebih arif dalam kurikulum bercorak amali,” kata Profesor Law.

Seorang lagi penceramah, Profesor Vineeta Sinha, ketua program Pengajian Asia Selatan di NUS, berkata sama ada seseorang itu melalui laluan akademik atau yang menjurus ke arah kemahiran, kedua-duanya harus berupaya berjalan seiringan.

“Melihat satu sama lain sebagai musuh tidak berfaedah untuk kedua-duanya,” ujar beliau sambil menambah bahawa kedua-dua pihak mempunyai ‘musuh’ yang sama, iaitu keperluan kekal relevan mengikut arus yang ditentukan kuasa pasaran.